



Affons pigns da paucs meins tochen tier scolars dalla sisavla classa anflan agid e schurmetg egl «igniv dalla columba» da Barbara Casanova.




Era ils affons dalla scoletta portan ina mondura da scola. Ils affons digl Urpi Wasi han bunas schanzas per ina meglia veta.

# Affons ventireivels egl igniv dalla columba

Barbara Casanova da Sursaiassa s'engascha dapi 30 onns en favur dils affons a Peru

DA GIUSEP VENZIN / ANR

■ **Barbara Casanova numna Ivonne e Cassandra sias buobas. Avon 14 onns eis ella sedecidida da dar schurmetg allas duas buobas ed al frar Victor Abel. En in spital da Cusco ha ina tgi-runza fatg attent la dunna da Sursaiassa dils trimellins nievvaschi. Els affons pesavan 1400 grams. Oz ein las duas buobas ed il buob scolars diligents dalla scola dil scalem superiur. Ivonne e Cassandra han ina finamira. Ellas vulan far in emprendissadi mercantil ed exe-**



quir pli tard l'administraziun da Urpi Wasi, dalla casa d'affons da Tia Barbi. Els treis affons ein treis da plirs mellis affons che han anflau tier Barbara Casanova in dacasa. Actualmeins visetan 370 affons dil marcau ch'ei liug da partenza per la viseta dil Machu Picchu la casa marcanta sin in crest. Els affons da treis meins tochen 13 onns ein il di egl Urpi Wasi che munta igl igniv dalla columba. La notg ein els a casa tier ils geniturs. Quels geniturs san s'annunziar il fevrer tier Barbara Casanova e gia in di avon il termin stattan els en retscha per gie buca munchentar la caschun. La dunna da Sursaiassa e collaboraturas vise-

tan allura las famiglias e decidan tgei affons ch'anflan suttegg ella casa ed ella scola. Per quels che han quei cletg eisi ton sco in da sis el lotto. Egl «igniv dalla columba» survegnan ils affons avunda da magliar, ina excellenta scolaziun ed ina instrucziun etica e sociala. Era ils geniturs ein integrai el process d'educaziun e la dunna da 60 onns viseta nunspitgadameins ils geniturs per mirar co ei vesa ora a casa. «Ei fa buca senn da mussar als affons disciplina ed etica sche quei succeda buca era a casa.» Las mummas ston era separticipar als cuors d'alfabetisaziun.

### Ina casa plein legria

A caschun da miu viadi tras il Peru e la Bolivia hai jeu giu la caschun ni plitost il cletg d'emprender d'enconuscher Tia Barbi. Aschia vegn Barbara Casanova numnda dils affons. Onda Barbi ha mussau las stanzas culs affons pigns, ina anada suenter l'autra. Els affons ein vescales e respandan legria. «Jeu survegn mintga di la pagaglia», ha la dunna ch'ei dapi 30 onns a Cusco detg. Els eglis dils affons tarlischan vesend Tia Barbi. Els san ch'els ein mitschai cun siu agid dalla pupira e meinsvart era digl uffiern. Barbara Casanova ha fundau Urpi Wasi cun ina canorta d'affons, ina scoletta e la scola primara tochen la sisavla classa e finanziescha il project cun donaziuns d'amitgs en Svizra ed en Tiaratudestga. Menada tenor il sistem svizzer ei la scola ina dallas meglieras dil marcau ch'era il temps dils Incas il center dil mund.

«El decuors digl onn vargau ei semusau ch'igl avegnir resta incerts sch'ei gartegia buca da preparar ils affons cun carezia e premura, cun responsabladad e disciplina sin quei avegnir.» Quei scriva Barbara Casanova el rapport annual da Urpi Wasi. En Peru ed ellas autras tiaras dalla America dil sid regia corrupziun ed ils regents miran igl emprem per sesezs e ditg suenter pils auters. Els paupers ein ils davos en retscha. Violenza, alcohol e machissem ein savens la consequenza ed ils affons ein quels che piteschan il pli fetg dalla desperaziun.

### Stipendis pils meglers scolars

Ils meglers scolars digl Urpi Wasi survegnan stipendis e san ir vinavon a scola. Actualmeins gaudan 19 giuvenils quei sustegn finanziaus dalla Fundaziun Pro Niño. Cul stipendi eisi denton buca fatg. Els ston frequentar la scola secundara denter ils meglers, autruisa eisi finiu cul sustegn. Ivonne, Cassandra e Victor Abel ein treis dils scolars cun stipendi ed els ein denter ils meglers dalla classa. Avon 14 onns ha Barbara Casanova buca giu bia letga vesend ils trimellins nievvaschi. Siu engaschi pils treis affons ei sepagaus sco era igl engaschi per mellis affons dil marcau cun gleiti 400 000 habitonts sin 3400 meters sur mar.

Förderverein B. Casanovas Urpi Wasi, Cusco-Peruc/o Elisabeth Jud, 6317 Oberwil b.Zug, Zuercher Kantonalbank, 8010 Zuerich CH44 0070 0350 0413 8611 8



Barbara Casanova ha realisau ina ovra grondiusa e dat albiert a 370 affons da Cusco.



Ils eglis dils affons tarlischan vesend Tia Barbi. La dunna da Sursaiassa ha liberau mellis affons dalla paupradad e meinsvart era digl uffiern sin tiara.



Cusco ei il liug da partenza a Machu Picchu. Il center dils Incas ei ina dallas siat miraculas novas dil mund.

FOTOS G. VENZIN



Mintga classa dalla scola da Barbara Casanova dumbra 35 scolaras e scolars. Las stanzas ein semplas, denton funcziunalas.